


Ni Presidente
Thomas S. Monson



Yawag ni Presidente Monson ti Tured

Kalablabas ti maysa nga oras, napaliuw ni Presidente Thomas S. Monson, ngem naawagantayo nga agaramid kadagiti pili ti maysa a kita wenno sabali.

Tapno makaaramid kadagiti nasirib a pangngeddeng, imbalakadna, kasapulantayo ti tured—“ti tured a mangisao iti saan, ti tured a mangisao iti wen. Dagiti desision ti mangikeddeng iti pagtungpalantayo.”¹

Iti sumaganad nga adaw, ipalagip ni Presidente Monson kadagiti Santo iti Ud-udina nga Aldaw a kasapulanda ti tured a mangitakder iti kinapudno ken kinalinteg, mangitandudo iti no ania ti patienda, ken mangsaranget iti lubong a mangum-umsi kadagiti agnanayon nga ik-ikkan pateg ken prinsipio.

“Kanayon nga umay iti tunggal maysa kadatayo ti awag iti tured,” kinunana. “Kankanayon ken kankanayonto latta”²

Ti Tured ti Mangisangbay iti Pananganamong ti Dios

“Maipasangotayto amin iti panagbuteng, mapadasantayto ti maumsi, ken sabtentayonto ti pannakasuppiat. Maaddaantayo koma—datayo amin—iti tured a magsuppiat iti napagnunumuan ti kaaduan, ti tured a mangitakder iti prinsipio. Ti tured, saan a kompromiso, ti mangisangbay iti isem iti pananganamong ti Dios. Ti tured ket agbalin a nabiag ken addaan iti makaayayo a saguday no maibilang daytoy a saan laeng a tay panangaklon ti kinamalalaki nga

ipapatay no di ketdi pay kas maysa a determinasion nga agbiag a sidadayaw. Iti intay panagtultuloy, ikalikagumtayo ti agbiag a kas rumbeng, awan duadua nga maawattayo ti tulong manipud iti Apo ken mabirukantayo ti liwliwa kadagiti balikasna.”³

Agibtur nga addaan iti Tured

Ania ti kaipapanan ti agandur? Magusgustuak daytoy a kaipapanan: *ti agibtur nga addaan iti tured*. Mabalin a kasapulanyo ti tured tapno mamati; kasapulanyonto daytoy bayat ti panagtungpalyo. Awan duadua a kasapulanto unay daytoy iti panaganduryo agingga iti dayta nga aldaw a panawanyonto daytoy mortal a panagbiag.”⁴

Maaddaan iti Tured a Mangitakder iti Kinapudno

Maaddaankayo [koma] iti tured a sititibker a mangitakder iti kinapudno ken kinalinteg. Gapu ta ti ayo iti kagimongan ita ket adayo kadagiti ik-ikkan pateg ken prinsipio ti Apo nga intedna kadatayo, napasingkedenan ti inkay pannakaawag tapno itandudo no ania iti pasienyo. Malaksid no sititibker a naimula dagiti ramut ti pammaneknekyo, marigatankayto a mangibtur iti umsi dagiti mangsubok iti pammatiyo. No sititibker a naimula, ti pammaneknekyo iti ebanghelio, iti Mangisalakan, ken iti Nailangitan nga Amatayo ket mangaringto iti amin nga aramidenyo iti unos ti panagbiagyo.”⁵

Kasapulantayo ti Naespirituan ken Naindayawan a Tured

“Dagiti mensahe a nailadawan iti television, kadagiti sine, ken iti sabali pay a media [ita] ket masansan unay a kasupadi dayta kayattayo nga arakupen ken ipateg dagiti annaktayo. Pagrebhengantayo saan laeng a mangisuro kadakuada nga agbalin a nasalun-at iti espiritu ken doktrina no di ket tulongan pay ida nga agtalinaed iti kasta a wagas, iti laksid kadagiti puersa iti ruar a mabalin a pakaipasanguanda. Kasapulanto daytoy ti adu a panawen ken panangikagumaanantayo—ken tapno matulongantayo dagiti sabsabali, kasapulantayo mismo ti naespirituan ken naindayawan a tured a mangsarked iti dakes a makitatayo iti tunggal bangir.”⁶

Agbalintayo Koma a Kanayon a Natured

“Iti panagbiagtayo iti inaldaw-aldaw, di mapengdan ti pannakasuot ti pammatitayo. No dadduma makitatayo ti bagbagitayo a napalawlawan kadagiti sabali a tattao ngem nakatakdertayo iti bassit nga ummong wenno agmaymaysatayo a mangitaktakder iti no ania ti maikanatad wenno saan. . . .

“Agbalintayo koma a natured ken nakasagana a mangitakder iti no ania ti patientayo, ken no nasken nga agmaymaysatayo a mangitakder kabayatan ti panagtultuloy, maaramiditayo koma daytoy a situtured, a napapigsa iti pannakaammo nga iti kinapudnona saantayo nga agmaymaysa iti kaano man no agtakdertayo a kaduatayo ti Amatayo iti Langit.”⁷

DAGITI NAGADAWAN

1. Thomas S. Monson, “The Three Rs of Choice,” *Liahona*, Nob. 2010, 67, 68.
2. Thomas S. Monson, “The Call for Courage,” *Liahona*, Mayo 2004, 55.
3. Thomas S. Monson, “Be Strong and of a Good Courage,” *Liahona*, Mayo 2014, 69.
4. Thomas S. Monson, “Believe, Obey, and Endure,” *Liahona*, Mayo 2012, 129.
5. Thomas S. Monson, “May You Have Courage,” *Liahona*, Mayo 2009, 126.
6. Thomas S. Monson, “Three Goals to Guide You,” *Liahona*, Nob. 2007, 118–19.
7. Thomas S. Monson, “Dare to Stand Alone,” *Liahona*, Nob. 2011, 60, 67.

PANANGISURO MANIPUD ITI DAYTOY A MENSAHE

Mabalinyo a dawaten kadagiti sursuruanyo a mangpanunotda iti maysa a situasion iti umay a lawas—iti pagtaengan, iti trabaho, iti eskuela, wenno iti

simbaan—a mamagkasapulan kadakuada nga agtignay nga addaan iti tured. Mabalin a sanguenda ti panagbuteng, agandur iti maysa a banag a mapannubok, mangitakder kadagiti pammatida, wenno mangikeddeng nga agtungpal a naan-anay iti maysa a pagbatayan ti ebanghelio. Awisenyo ida a mangibinglay kadagiti kapanunotanda wenno mangisurat kadagitoy.

AGTUTUBO

Maysa a kas ken ni Sarah

Ni McKenzie Miller

Sigud a marigatanak a mangusar kadagiti pammatik kas sungbat iti maysa a saludsod kas kasimple ti “Apay a saanka nga umin-inum iti kape?” Iti napalabas ipambarko no kua kas “Napait unay” wenno “Diak magustuan ti ramanna.”

Apay a mabainak? Apay a mabutengak unay a mangitakder iti no ania ti patpatiek? Ti pannakalagipko itan, diak talaga maawatan no ania ti nagbutngak. Ngem naan-anay a maawatakon idi insardengkon ti panagpambarko.

Maysa nga aldaw iti klasek iti Ingles iti haiskul, im-pakaammo ti mangisursuro nga agbuyakami iti maysa a paset ti pabuya iti TV nga ammok a di rumbeng a buyaek. Idinto ta agdiridir-i iti gagar dagiti dadduma nga estudiante, ingngato ni Sarah ti imana ket indawatna no mabalinnan ti pumanaw.

Idi saludsoden ti manursuro kenkuana no apay, insungbat ni Sarah ti maysa a banag nga adda kinapudnona, “Agsipud ta siak ket Mormon, ken saanak nga agbuybuya kadagiti nalaad a pabuya.”

Ti turedna a nagtakder iti sanguanan ti klase ket makapasiddaaw. Agyamanak ken ni Sarah, timmakkderak met ken nagurayak iti ruar nga addaan iti nadalus a konsensia agingga a malpas ti pabuya.

Agnanayon a nagbalbaliwak. Inrugik ti nangilawlawag kadagiti pammatik imbes a panangliklik iti pagsaritaan. Ken kas bungana, nakasarakak iti panagtalek iti bagik ken ad-addan ti pannakidanggayko kadagiti aktibidad iti Simbaan ken iti pagadalan.

Diak pulos imbaga ken ni Sarah no kasano ti kinapategna kaniak daydi a pagwadanna, ngem padasek a tuladen ti pagawadanna iti panagtalek. Naamirisko itan a ti maysa a kameng ti nakaskasdaaw, sagrado a Simbaan ti Dios ket awan a pulos ti inna pagbainan. Sapay koma ta kabaalak, babaen ti pagwadak, ti agbalin a maysa a kas ken ni Sarah.

Agnaed ti nagsurat iti Utah, USA.

ANNAK

Kinatured kadagiti Nasantuan a Kasuratan

Isuro ni Presidente Monson kadayo a maaddaantayo iti tured ken mangitakder iti no ania ti patientayo. Adu kadagiti nasantuan a kasuratan dagiti pagarigan dagiti tao a nangipakita iti tured. Basaen ti nasantuan a kasuratan a kasaruno ti tunggal nagan. Kasano a nangipakita iti tured dagitoy a tattao ken nangitakder iti no ania ti ammoda nga umno? Mabalinyo nga isurat wenno mangidrowing iti ladawan dagiti sungbatyo.

Daniel (Daniel 6:7, 10–23)

Esther (Esther 4:5–14; 5:1–8; 7:1–6)

Samuel a Lamanite (Helaman 13:2–4; 16:1–7)

Joseph Smith (Joseph Smith—Pakasaritaan 1:11–17)



Pammati, Pamilia, Tulong

Dagiti Kababalin ni Jesucristo: Saan a Manangallilaw wenno Managinsisingpet

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawatyo iti biag ken mision ti Mangisalak ket mangpapigsa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Daytoy ti paset ti maysa a serye dagiti Mensahe iti Visiting Teaching a mangitampok kadagiti aspekto ti mision ti Mangisalak.

Iti pannakaawattayo a saan a manangallilaw ken managinsisingpet ni Jesucristo ket makatulongo kadatayo a sipupudno a mangikarkarigan a surotentayo ti pagwadanna. Elder Joseph B. Wirthlin (1917–2008) ti Korum dagiti Sangapulo-ket-dua nga Apostol kinunana: “Ti mangallilaw ket mangloko wenno mangyawawan. . . . Ti tao a saan a manangallilaw ket tao nga inosente, pudno ti panggepna, ken nadalus dagiti gandatna, a ti biagna mangyanninaw iti simple nga aramid iti panangitunosna kadagiti inaldaw a tingnayna kadagiti pagbatayan ti integridad. . . . Mamatiak iti kinapategna para kadagiti miembro ti Simbaan ti agbalin a saan a manangallilaw ket mabalin a nasnasken itan ngem iti dadduma a gundaway gapu ta adu ditoy lubong ti saan a makaawat iti kinapateg daytoy a saguday.”¹

Maipapan ti panaginsisingpet, kinuna ni Presidente Dieter F. Uchtdorf, Maikadua a Mammagbaga iti First Presidency kinunana: “Awan kadatayo ti naan-anay a kas ken ni Cristo kas iti ammotayo a nasken koma a pagbalinantayo. Ngem napasnek ti tarigagaymi a mangatur

kadagiti babakmi ken ti mabalin a panagbasolmi. Iti puso ken kararuami tarigagayanmi ti agbalin a nasaysayaat babaen ti tulong ti Pannubbot ni Jesucristo.”²

Ammomi a “maukomtayonto a mayannurot kadagiti tignaytayo, dagiti tarigagay ti puspustayo, ken ti kita ti tattao a nagbalinantayo.”³ Ngem no ikarigatantayo ti agbabawi, agbalintayo a natartarnaw—ken “nagasat dagiti natarnaw ti panagpuspusona: ta makitadanto ti Dios” (Mateo 5:8).

Dagiti Mainayon a Nasantuan a Kasuratan

Salmo 32:2; Santiago 3:17;
1 Pedro 2:1–2, 22

Manipud kadagiti Nasantuan a Kasuratan

Saan a manangallilaw dagiti babassit nga ubbing. Kinuna ni Jesucristo: “Bay-anyo dagiti babassit nga ubbing nga umayda kaniak, ket dikay pawilan ida: ta dagitoy isuda dagiti agtagikua ti pagarian ti Dios. . . . Ket inarakupna [dagiti ubbing], impatayna kadakuada dagiti im-imana, ket binendisionanna ida” (Marcos 10:14, 16).

Nagministro pay ni Cristo kadagiti ubbing iti America kalpaskan ti Pannakailansana iti krus. Imbilinna

nga ipan dagiti tao dagiti babassit nga annakda Kenkuana ket “indissoda ida iti daga iti aglawlawna, ket nagtakder ni Jesus iti tengnga; . . .

“ . . . [Ket] nagsangit idi naisawangna dagitoy a balikas, ket pinanekekan ti ummong daytoy, ket inubbana dagiti ubbingda, a sinaggaysa, ken binendisionanna ida, ken inkararaganna ida iti Ama. . . .

“Ket idi kumitada naiturong dagiti matada iti langit, ket namatanganda ti panaglukat ti langit, ket nakitada dagiti anghel a bumabbaba manipud iti langit a kasla adda iti tengnga ti apuy; ket bimmabada ken linawlawda dagiti ubbing, . . . ket tinulongan ida dagiti anghel” (3 Nephi 17:12, 21, 24).

DAGITI NAGADAWAN

1. Joseph B. Wirthlin, “Without Guile,” *Ensign*, Mayo 1988, 80, 81.
2. Dieter F. Uchtdorf, “Come, Join with Us,” *Liahona*, Nob. 2013, 23.
3. *Handbook 2: Administering the Church* (2010), 1.2.1.

Ibilang Daytoy

Ania ti masursurotayo maipapan ti panangallilaw manipud kadagiti babassit nga ubbing? (Kitaen iti Pangiwawan iti Nasantuan a Kasuratan, “Allilaw.”)